

I to te nunaa e,

Ia ora na otou na roto i teie nei rata iti. I horo iho nei tatou no te maitiraa i te Peretiteni o te hau Repupirita. Tei mua ia tatou i teie nei te huru no te hororaa matamua e te parau no na tia i mahiti mai, oia o MITTERAND tane e o GISCARD tane. Oia ia, ua faahoi faa hou hia mai i mua ia tatou, e to te nunaa, te parau e te mana no te maiti, i rotopu i na tiane, i te huru o te aratairaa o te oraraa o ta tatou e hinaaro no tatou te MAOHI i nia i to tatou aia.

E piti anae ra taata, oia, e piti anae ra aratairaa teie e vai nei i mua ia tatou, ua mairi atu te rahiraa. Ua reva atu na te mau parau e te mau tatararaa a IA MANA TE NUNAA. I TE FEIA ATOA RA TEI HOROA ; I TO RATOU TIATURIRAA I NIA I TO RATOU MAU TIA I MAIRI, TE ANI ATU NEI AU IA OTOU IA FERURI MAITE A NO TEIE NEI HATUARAA PITI.

Te faahaamanoa noa atu nei ra vau e, e tei roto i to tatou rima i teie taime te mana no te aratai i to tatou nunaa MAOHI i nia i tona tiamaraa, no te tatara ia taaé atu ia tatou te poura atomi, e no te faahoi faahou mai ia tatou e to te nunaa MAOHI i roto i to tatou hiroa tumu maohi, ia tia mai to tatou ui api no ananahi i nia i to na iho tia raa mau, oia, te tiaraa nunaa maohi no te fenua maohi. Inaha hoi, aita vau e manao nei e, tei roto tatou i te ite ore i te huru no te aratoraa e arato hia nei ia tatou, no reira e mea tia, e mea hanahana e te tura, IA TIAMA TE MAOHI I NIA TONA IHO FENUA, a tupu atu ai te faaauraa i te mau fenua éé ra, e faaauraa ia no te taata tiama.

Te uiui noa nei i i teie mahana i to tatou mau metua,
"tei hea ae nei te hiroa tumu māohi, te mau faufaa tumu māohi
ta to otou mau metua e ta te mau metua o to otou mau metua i
pūpū mai i roto ia otou na ?" Ua tau i to tatou oraraa, e parau
mau, aita ra vau e manao nei e mea tia ia horo noa tatou i roto
i te hoe tauiraa e moe roa tu ai to tatou hiroa tumu māohi, oia
hoi e moe roatu ai te māohi ia na iho. Ia horo rā tatou e ia
tutava no te faa ora e no te haapaari i te tiaturi raa i te
māohi ia na iho. No reira, ia vai ā e ua vai mai ā te manaonao
i roto ia otou na e to te nunaa māohi e, te manaonao i te nunaa
māohi.

I TE FEIA ATOA I HOROA MAI I TO RATOU TIATURIRAA I TE
HATUARAA MATAMUA TE FAATAE ATU NEI AU I TE TAPAO NO TE AROHA
E NO TE MAURURU I TO OTOU ITOITO E TE TUUTUU ORE I ROTO I TE
HORORAA TA TATOU E TAUTOO NEI, NO TE HOE FAATERERAA HAU MANAHUNE
NO TO TATOU AIA. IA MAU À, IA MAU PAPU À I TE MANA E TE TIAMÀ-
RAA I ROAA MAI IA TATOU I TEIE MAHANA NO TEIE HATUARAA PITI.
FAAITOITO MAI OTOU I TO OTOU NA PAE, No te ravai ore i te ravea
moni, ua manao vau e, e tere haere na tahiti noa nei na roto i
te mau oire rarahi no te tauturu i te mau vahi paruparu.

No reira, ore noatu tatou e farerei i roto i na hepetoma
nei, no te poto ia o te taime, a tia noatu rā, no tatou nei ā tatou
i ore ai i farerei, e no tatou nei ā tatou e farerei ai, oia
NO TE NUNAA MAOHI. A faaitoito mai, te itoito nei au no to otou
itoito. I TE IO NO ME TE ANI HAEHAA ATU NEI AU IA OTOU PAATOA
IA TAPEA I TE AVEIA, IA MAITI IA FRANÇOIS MITTERAND

Ia otou paatoa na, a farii mai i te tapao no te aroha
ia otou na e teratu ā te pari pari a IA MANA TE NUNAA

" E TU, E TU ... EIAHA IA MATE ... MANAVA IA ORA."

Maururu ā no to otou taio raa mai e iaora na.



Jacqui DROLLET

Papai parau rahi

tia no François MITTERAND

I POLINESIA.